

Uunga siunnersuut: Ilinniarnertuunngorniartarneq pillugu Inatsisartut inatsisaata allanngartinnera pillugu Inatsisartut inatsisaat nr. xx, xx. xxx 2020-meersoq
(Ilinniartitaanermut, Kultureqarnermut Ilageeqarnermullu Naalakkersuisoq)

Saqqummiussissut

(Ilinniartitaanermut, Kultureqarnermut Ilageeqarnermullu Naalakkersuisoq)

Aappassaaneerpeqarnera

Aallaqqaatitut Naalakkersuisut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq qutsavigaat siunnersuutip peqqissaartumik suliarineranut aamma isumaliutissiissummut.

Naalakkersuisut naammagisimaarlugu paasivaat Ataatsimiititaliap tamarmiusup siunnersuutip akuersissutigineqarnissaa inassutigigaa.

Qinnuteqartarnermut allannguutissanut siunnersuutigineqartunut tunngatillugu ataatsimiititaliap malugisimavaa ilinniartussatut tiguneqarneq tamatigut ilinniakkamik naammassisaqartarnermik isumaqartanngitsoq, pingaaruteqartorlu taamaatitsisarnermut peqqutaasut aaqqiissutissallu annertuumik alaatsinaanneqarnissaat, amerlanerpaat inuusuttuaqqanut ilinniartitaanerni ilinniartuunnaqqullugit naammassisaqaqullugillu. Tassunga atatillugu Naalakkersuisut ilisimatitsissutigissavaat Naalakkersuisut taamaatitsiinnartarnerup akiorneqarnissaa annertusakkamik alaatsinaatarimmassuk.

Ataatsimiititaliaq allappoq meeqqat atuarfianni inaarutaasumik naliliineq pillugu Namminersornerullutik Oqartussat nalunaarutaat nr. 3, 9. januar 2009-meersumi § 93, imm. 2, nr. 5-ip qallunaatuaa marloqiusamik paasineqarsinnaasoq, taamaattumillu Ataatsimiititaliaq siunnersuuteqarpoq nalunaarummik nutaamik saqqummiussisoqassasoq, qallunaatuuanilu ersersinneqassalluni taanna qanoq paasineqassanersoq.

Naalakkersuisut oqaaseqaat taanna tusaatissatut tiguaat. Meeqqat atuarfianni inaarutaasumik naliliineq pillugu nalunaarutip nutarternissaanut Naalakkersuisut pilersaaruteqarput, tassungalu tunngatillugu Ataatsimiititaliap taasimasai alaatsinaanneqassapput.

Taassuma saniatigut Ataatsimiititaliap Naalakkersuisut kajumissaarpaat ilinniarnertuunngorniarnermi qaffasissuseq appariartornersoq misissorneqaqullugu rektorit immikkut akuersissuteqarsinnaanngornerata kingunerisaanik, inatsimmut allannguutissap atulersinneqarnerata ukiumik ataatsimik marlunnilluunniit kingornatigut.

Kajumissaarut Naalakkersuisut tusaatissatut tiguaat, tamannalu tunngavigalugu ineriartorneq malittarineqassaaq ingerlaavartumik Ataatsimiititaliarlu tamanna pillugu ilisimatinneqartassalluni.

Ataatsimiititaliamik ilisimatitsineq naapertorlugu Naalakkersuisut allannguutissatut siunnersuummik saqqummiussaqaassapput oqaatsit marluk naapertuuttunngornissaat anguniarlugu.

Taamatut oqaaseqarlutik siunnersuutip pingajussaaneerseqarnissaa Naalakkersuisut innersuussutigaat allannguutissatut siunnersuummi allannguutissat akuersissutigineqarnissaat anguniarlugu.